

四庫全書

史部

欽定四庫全書

史部

平定朔漢方畧卷十九

詳校官編修_臣曹振鏞

編修_臣裴謙覆勘

總校官進士_臣繆琪

校對官中書_臣朱斯

謄錄監生_臣伍士鵬

欽定四庫全書

聖祖仁皇帝親征平定朔漠方略卷十八

十二月癸巳中路督運于成龍奏請押運人員
于成龍奏言中路米車四千輛絡繹前進約長
百有餘里凡陟嶺渡河及泥濘難行之處未免
耽延應兼用小車及駱駝騾馬分載遞運至押
運僅用司官十二人惟恐鞭長不及必得情願
効力人員准臣等帶往以備策用庶可無虞遲

悞更得久歷邊疆能聲夙著之將弁數員責令
巡徼捍衛後先非惟有濟軍需亦且威揚域外
奏上得

旨于成龍以軍需緊急必用駝馬小車分載遞運奏
請甚是但此路朕經親歷俱係大道並無險嶺大
河泥濘難行之處若用駝馬小車反覺煩雜不必
兼備餘著會同大學士戶兵二部僉議

議中路米車官少似難分押請不論旗民有官

無官人願隨運効力者准于成龍盡行題帶至
米車分行前後晝夜巡防千把微員恐難勝任
可調取副將王起龍遊擊劉虎守備林之本等
協力前往議入

上從之尋于成龍奏以効力人員內分百人給西路
命撥宣化山西馬匹隨西路進剿之兵時大學士伊
桑阿等同兵部議現在宣化府喂養之馬并山
西急公捐助馬騾合計一萬二千一百九十四匹

請於西路進勦右衛兵五千及京城增發之兵
按名給與一馬隨行餘馬仍留宣化府以為中
路大兵之備

上是之

甲午

命增派原任兵部督捕右侍郎王國昌太常寺卿喻
成龍督運西路軍糧

上諭大學士伊桑阿等曰西路輓輸較中路尤為緊要

除左都御史于成龍外可撥一大臣往督西路運務其効力人員亦應酌撥爾等會同于成龍公議

議曰請

上於李鈔等三大臣內簡撥一員分督西路更請

勅山西一省有願西路効力者令督運大臣帶往除前造米車一千一百輛外應增造四百輛其輓此增造車者仍令山西撫標鎮標兵充用口糧及車上需用什物亦行該撫備給議入得

旨西路運米著侍郎王國昌正卿喻成龍往督之增
造運車四百輛亦著動支正項錢糧其情願効力
人員無論山西及他省文武職官閒散人等俱准
前去事竣凱旋之日中西兩路凡運米人員定照
軍功議叙餘如所議

丙申增派中路軍中護軍叅領

上諭大學士伊桑阿等曰西路大軍既合四人為一朋
中路兵亦應如是此軍前進務照旗分令各該叅

領率其兵之輜重行囊按隊聯行加意管攝中路
護軍叅領每旗原派八員今既以四員撥往西路
應每旗增派四員交兵部作速傳示

丁酉刑部尚書圖納等條奏西路進剿機宜先
是

上命圖納赴陝會集將軍總督巡撫提督總兵官等於
莊浪要地議西路進剿事至是圖納等密奏言
上命分兵兩路進剿使噶爾丹東西瞻顧不暇我軍進

退無憂

睿算實出萬全今應自陝西一路進兵使出鎮彝由
黑河托賴河交流處取昆都倫而進選熟諳路
徑蒙古以為嚮導但我軍進討糧糗俱係親攜
倘事起卒然接戰之兵分力必多請於萬名兵
外益以綠旗兵三千著一總兵官統領尾大軍
之後而進如是縱猝遇寇至行囊輜重不憂守
護無人至我兵深入恐附近蒙古乘虛煽搖宜

酌調固原提標官兵為之防禦再檄諭西海諸
台吉與策旺喇卜灘及土魯番等使知罪在噶
爾丹與衆無預至內地多巴係市賈集場恐噶
爾丹奸宄百出使人潛居窺伺應令該地方文
武官不時嚴察奏至

旨下議政大臣及大學士等集議議以此路進勦官
兵今於來年三月二十日前後啟行其所請嚮
導蒙古應馳驛召副都統阿南達回同理藩院

司官筆帖式往喀爾喀諸扎薩克旗分選撥能
識和卜多路徑者二十人再選巴圖爾額爾克
濟農屬下十人著阿南達帶赴孫思克軍前同
進餘悉如尚書圖納奏議入

上從之

命以都統伊勒慎等為西路叅贊

上諭大學士伊桑阿等曰撫遠大將軍費揚古軍中著
都統伊勒慎護軍統領宗室費揚固瓦爾達副都

統碩岱為叅贊併將軍舒恕亦為叅贊西路大臣
既已足用護軍統領蘇丹可使在中路

戊戌

命給西路增發官兵行糧及飼馬芻豆兵部奏言據
統領西路大兵都統伊勒慎等咨稱擬於是月
二十日起行請支自京至大同十日之米到大
同後計喂馬日期支米併請給官兵行糧及喂
馬草豆查行糧定例每月給將軍二十兩叅贊

大臣十七兩都統十五兩前鋒統領護軍統領
副都統各九兩參蘭大前鋒叅領各七兩叅領
學士一等侍衛各五兩散騎尉侍讀學士前鋒
侍衛二等三等侍衛各四兩署散騎尉侍讀中
書各三兩護軍校驍騎校六品七品筆帖式匠
局長等員各二兩五錢署護軍校驍騎校及兵
丁各二兩匠役各一兩又查喂馬定例將軍二
十五匹都統二十匹前鋒統領護軍統領副都

統各十八匹參蘭大等各十四匹叅領侍讀學士各十二匹前鋒侍衛散騎尉侍讀各十匹護軍校驍騎校中書署護軍校驍騎校等各八匹護軍撥什庫各四匹驍騎三匹匠役二匹每馬一匹給豆八倉升七觔草二束今此前往西路大臣官員以及兵丁執事應給五月行糧現於京城支放兩月由大同前進時再令晉撫散給三月其官兵赴大同十日之糧照前會議之數

於京城支給在大同喂馬四十日由大同至湖
灘河朔按日計口之糧行文晉撫亦照前僉議
之數支給再大同喂馬之草豆交晉撫照前定
例給散大臣官員其兵丁俱准給四匹之草豆
議上

上曰此去西路兵衆著於京城現給三月行糧至大同
喂馬起行時再給四月餘如所議

命曉諭隨軍効力人員准與議叙

上諭大學士伊桑阿等曰凡革職候缺官員及進士舉
監生秀與無頂帶筆帖式烏林人內有願身入戎
行竭力自効者准其前去凱旋之日革職等人以
原官起用候缺及進士等人以應陞先用倘被傷
陣亡則革職者照其原官賞賚議叙候缺及進士
輩照其官之品級賞賚議叙倘本人年衰疾廢身
不能前遣伊弟昆子姪代行亦如本人賞賚議叙
可著兵部通行曉諭

已亥

命將軍博濟統滿洲兵將軍孫思克統綠旗兵偕副都統席爾哈達祖良璧馬自德巴陵從西路進

剿

命固原提督李林隆留守陝西甘肅副都統阿蘭泰兼管綠旗兵駐寧夏副都統費揚固駐西安

命總兵官殷化行等西路從征時將軍孫思克奏請西寧總兵官韓弼畱守地方其寧夏總兵官殷

化行涼州總兵官董大成肅州總兵官潘育龍
直隸總兵官岳昇龍貴州威寧總兵官唐希順
及陝西延綏鎮遊擊祁朝祥建昌路都司方凱
俱令從征

上命議政大臣集議議曰總兵官岳昇龍都司方凱已
撥往中路可無議餘俱如該將軍孫思克所請
帶往其甘肅陝西副將以下俱照兵數帶往至
尚書圖納議奏隨大軍綠旗兵三千亦令該將

軍於四總兵官內酌撥統領議上

上從之

命賞賚西路兵卒

上諭議政大臣宗室蘇努等陝西一路進勦大兵及綠旗兵按名賞銀十兩以整器械務使均沾實惠毋虛朕意其西路進勦右衛兵察哈爾兵亦著一體賞賚

命定隨軍火礮

上諭兵部前烏關布通所攜大礮太重今次出師應選
比前稍輕者令每旗各帶一門前去著查閱現在
火礮議奏兵部會同漢軍都統副都統等查閱議
奏八旗礮局所有成威永固大將軍礮六
十一門鐵紅衣礮十八門臺灣解到大銅礮十
九門神威無敵大將軍礮十七門大銅礮五十
四門西洋銅礮七門木鑲銅礮十九門神濟將
軍礮四十門諸礮重八千觔至一千觔有差冲

天礮三門臺灣解到小銅礮八門神威礮一百
六十門得勝礮法功礮鐵心銅礮小銅礮共一
百四門諸礮重八百觔至一百觔有差查軍中
現備火礮八旗滿洲每旗馬駝子母等礮各五
門漢軍每旗馬駝子母等礮各九門龍礮各一
門每翼冲天礮各一門應照原奏帶往外大同
府所有神威礮二十四門應交該總兵官遣赴
西路大軍宣化府所有神威礮二十四門應交

該總兵官帶赴中路大軍其臺灣解到神威礮
約重四百觔舉行輕便應將此礮每旗各增帶
一門奏入得

旨所議宣化府礮定為中路甚善爾等可將神濟將
軍礮神威礮各一門送至景山朕親覽兵部隨呈
送

上閱畢

諭曰朕今新鑄礮十六門每門約重五百觔力可敵

神濟將軍礮俟鑄成其載礮車式即照載神威者製造

臣謹按軍器之中無猛於烏鎗火礮者其勢甚烈其力甚大誠戰陣之利器也

皇上深念勦滅噶爾丹當以火器為要特廣設鎗礮別建一營不時訓練又以舊礮重滯艱於運致新鑄礮式輕便易行力準大礮後擊敵時得火器之利居多昔之用兵者雖嘗用火攻而

制度精妙士卒嫻習未有如今日者良由

聖慮周詳無微不至隨機制械以利大兵之用是以能
破敵而奏膚功也

尚書圖納核奏陝西進勦官兵及糧餉數目圖
納等奏言陝西一路大兵進勦應如議政大臣
所議發西安滿洲兵三千派副都統二員署前
鋒總尉二員署前鋒叅領八員署前鋒校十六
員夸蘭大八員叅領五十六員驍騎校二十四

員火器營夸蘭大一員叅領四員驍騎校四員
再發漢軍火器營兵一千派副都統一員夸蘭
大八員叅領二十四員驍騎校二十四員其所
帶廝役自將軍以下綿甲軍以上數悉與中路
同又發綠旗兵共九千派總兵官及副將叅將
各四員遊擊及守備各八員千把總各三十三
員其廝役名數提督十總兵官七副將叅將各
六遊擊五守備四千總把總各三合滿漢綠旗

官兵廝役等共二萬二千四百餘人每口按月
給倉斛米二斗通計五月共需米二萬二千四
百石餘若盡以駝負則所需駝數甚多亦應如
所議以牛羊代一月之糧其餘四月米令將軍
提督副都統總兵官各攜五斗夸蘭大叅領副
將叅將各攜三斗署叅領遊擊守備各攜二斗
自前鋒校驍騎校千總把總以至兵衆各攜五
升餘一萬七千二百石零皆以駝運設駝不足

即以茶易之馬匹用又不足請動支正項錢糧
購買至甘肅所屬地方素無儲積若以西安倉
貯米石令其盤運則為路既遙殊多腳費宜令
於附近採買為便滿漢綠旗兵各給以五月行
糧其綠旗兵按月應得之米仍照例給與其家
為妻孥養贍奏至

上從之

庚子

命撫遠大將軍伯費揚古以其將軍事務暫授舒恕
乘驛速赴京師

辛丑

命和碩簡親王雅布効力中路時和碩簡親王雅布
以願從西路之軍請

旨

上命雅布候中路軍効力

命丁憂總兵官許靖國率晉撫標兵西路押運

壬寅

訓諭侍郎王國昌等嚴護糧運時王國昌喻成龍於是月十五日起行恭請

訓旨

上曰運米一事朕視西路尤為緊要爾等各體朕意嚴督押運人員行則結隊而前止則擇地而處後先聯絡晝夜分巡毋致疎虞以悞軍務所用嚮導官蒙古章京可向大將軍費揚古酌取

甲辰

命刊頒軍令

上諭兵部曰師出以律可奏膚功自我

太祖

太宗

世祖以至於今野戰必勝攻城必克所向無前雖士卒世
受國恩捐軀報効實由我朝軍紀森嚴信賞必罰
兼以兵馬精強器械整齊之所致也朕今次軍行

特規酌舊制叅以新謨爰著為令告我六師一大
軍出征本都統護軍統領副都統叅領等審視官
兵甲胄弓矢暨一切軍中器用務期堅利兵之盛
尾甲背及戰矢之幹各記名其上馬烙以印繫尾
處繫小牌書旗分佐領姓氏以為記號馬不烙印
追銀二兩箭不書名追銀十兩給首舉之人一啟
行時凡兵衆必各率行裝按旗隊以次前進不得
零星散亂後先越走自出國門以至旋師當各遵

守違者鞭責示警一在道毋離羣毋酗酒毋誼諱
毋叫呼不遵者該管官即行捕責一所過地方不
得擾害居民及蒙古部落如侵犯子女掠奪馬畜
蹂躪田禾及擅離營伍入村庄山谷強取一物者
兵丁廝役俱從重治罪其該管官及廝役之主一
併議罪一邊境以內凡兵役在逃立刻緝拿依定
例治罪出邊而逃該管大臣即發官兵務窮追捕
以正軍法設追緝不獲往追人從重治罪伊主併

該管官一併嚴處一下營務按旗列幕不密不疎
如越旗亂次前後攙雜者將該管大臣官員分別
治罪其兵役內有愍不畏法盜馬上零星諸物者
懲以鞭責盜馬匹及鞍轡者視盜贓多寡按律治
罪一出哨毋攜大纛各帶本旗顏色小旗遠距大
營設哨勤加巡視比暮則還就近地勿舉火勿攜
帳一人一騎其馬備鞍以待晝則近身牧放夜則
刈芻拴喂設寇至探明即飛報大營若無寇妄報

與寇近不知以致傳報稽遲者主將即將該汎坐
哨官兵立刻正法軍前示衆一值夜巡徼官兵必
張弓束服跨鞵并解甲囊以備不可怠忽無事人
昏夜不得擅行行者必問如衣服器械有異即行
擒拿苟貪睡偷安或人數缺少該管大臣察出嚴
治其罪一與寇相近管兵將軍大臣酌派前鋒叅
領率兵往探務詳審賊情虛實地勢險易并嚴飭
營中夜勿燃火一對敵列陣時主將必度地據險

寇或布野或結駱駝鹿角為營我軍分列行陣指
明某隊某旗當擊敵陣某處戰時鳴角進兵戰畢
仍鳴角收兵官兵或棄其部伍混入他人部伍或
軼出本陣往附他人尾後或逡巡觀望逗遛不進
照所犯輕重正法籍沒鞭責革職至我軍分陣進
擊某旗對陣敵堅不動即發所備援兵助擊之又
對面臨陣時王貝勒貝子公大臣官員或不依次
誼闖擁入或見敵寡不請擅進此一次功不議仍

以罪論一敵陣動搖我軍攻入當嚴禁官兵不得
掠人畜財物如不遵軍法貪行攫取者重懲不貸
一敵敗北即選兵馬追之隨派隊伍接踵繼進倘
追兵墮其伏中或遇寇遊兵我後隊兵與之接戰
前隊兵仍行追進一師旋日當嚴行禁止凡軍器
不得售賣存留與諸蒙古違者從重治罪該管官
一併議處一駝馬為師行要需須擇水草善地牧
放夜則加意巡防起營時留官兵於後收察遺失

駝馬審其印烙牌記各交原主其疲乏者即於就近地方官或村庄居民或扎薩克蒙古處辨色登數交與飼養仍以其數報明兵部如有將遺失駝馬隱匿乘用或因其疲乏委棄宰殺者嚴治以罪令駝馬原主開明遺失疲乏駝馬顏色數目亦報兵部登記一軍摺關繫綦重凡出征官兵須各計口按日支領攜帶倘不如額查出即從重治罪一有職掌大臣官員原各有親隨兵卒不得復於大

兵內抽取以分兵勢如委署人員及官之原無親
隨兵卒者許各抽一名一凡大兵存駐處毋令閒
惰每日較射磨礪器械所頒軍令不時宣諭令其
詳悉夫兵者所以討逆安民朕不得已而用統兵
大臣能體朕意嚴束屬下官兵於所過邊境內外
不輕取一笠使人民安堵如故奏凱日自行陞賞
如縱官兵為非擾害生事者定加重處凡茲軍令
應通行曉諭各路官兵如傳示不到即將傳示之

人以軍法從事爾部其以朕諭與前南苑所降之
旨一併刊頒俾各凜遵毋忽

命以用印空劄頒發將軍提督等獎勵綠旗効力官
兵

上諭議政大臣國舅佟國維等曰綠旗兵卒內有從本
陣前進超入駱駝營鹿角營衆人接踵齊進殺敗
敵寇者第一名優陞千總其督戰之員優陞二級
擢用至綠旗將弁內有親身超入駱駝營鹿角營

敗敵者優陞三級擢用著以用印空劄頒發將軍
提督總兵官凡綠旗官兵有顯著勞績者即照所
定職銜填註給與

戊申

命發盛京積貯草豆給官兵秣馬先是

上諭盛京將軍綽克託曰軍中馬匹關繫重大可加意

飼秣務令肥健至是綽克託奏言臣遵兵部咨備

兵二千所需馬匹共計八十餘匹臣地方今歲

歉收恐芻飼之需難於速購請於

盛京戶部與奉天府尹所屬州縣內暫借豆五千
石草三十萬束為秣養用俟來秋依數償納更
請照前預支官兵一年俸餉使備器械衣服亦
俟來歲如數扣還奏至

上諭議政大臣都統公宗室蘇努等曰前議討噶爾丹
陝西兵由鎮彝取昆都倫一路進發大將軍費揚
古兵由歸化城一路進發京師大兵由中一路進

發既有此三路分勦則盛京寧古塔黑龍江兵尚
無所用但軍需以馬為重兵雖暫停馬宜預養其
照將軍綽克託所請給與草豆飼養之責選才能
章京專董其事該將軍副都統等公同巡督其預
支俸餉一年俟有出師定期查所派官兵內前曾
支領者止給半年未經支領者可給一年親賚口
糧每名著攜三月至我軍三路進勦噶爾丹或勢
窮力竭沿俄僂東竄逃生令盛京寧古塔黑龍江

三將軍除前派定兵數外再酌量增發相機撲滅
可著副都統齊蘭布馳驛往諭

中路督運于成龍等奏請量增輓運夫馬時于
成龍等奏言駕車馬騾應令三省撫臣於原派
數外酌量多備以防倒斃設一時難以購買請
將江北湖北驛馬內通融借用俟大兵啟行後
令三省如數補償其輓車兵卒在宿處有守糧
牧馬掘井具炊之事一車一人似難兼攝更請

或五輛或十輛量增夫一名以備更替奏入
上從之

命古北鎮標兵從征先經會議發古北口兵二千名
輓中路米車至是

上諭于成龍等古北鎮兵素稱勁卒運米之役著另派
其二千兵俱令從征所需口糧爾等議奏議曰輓
車兵卒止派直隸撫標及天津鎮標二處古北
口兵原未派及以之出征甚便但地屬邊陲需

兵捍禦應以一千五百名從軍五百名居守其所需口糧應照進剿大兵各親賫八十日其隨運兩月之米以臣等增造車輛裝運議入

上從之

命寧古塔將軍佟保備兵秣馬佟保奏言臣等此地官兵聞令備兵皆跪而請曰身等窮邊小民蒙聖上揀為將卒飼以俸餉今願得自効以報

主上養之隆恩臣詳閱所轄烏喇及寧古塔官兵弓

勁矢強馬上嫻熟又教之以

皇上製發烏鎗愈加威壯且若輩俱耐勞苦臣請率一千五百名而往合軍中所有馬匹計二千九百有奇嚴督官兵加意飼養臣身不時稽察不足之馬現有白都納地方西白兵二千此兵既不動應派伊等出馬一千五百匹以充撥軍中取牛五百頭用以駕載火藥鉛子等物之車此馬牛交副都統沙納海監視肥秣不使貽誤寧古

塔兵既發三百應檄副都統耿額盡收兵丁所有馬匹亦親身督視喂養肥澤倘馬匹又或不足則將烏喇捕獵人等之馬亦酌量查取備用再前所備支之錢糧於九月發兵時已經發給此項應將三十五年兩季俸餉扣除停給但以新年後又復行兵請暫停扣除仍照常支放俟旋師之時再議扣具奏此軍除臣身必往外其副都統沙納海耿額應著何人從征伏候

上裁奏至

上諭議政大臣都統公宗室蘇努等曰前者爾等僉議以盛京兵二千寧古塔兵一千黑龍江兵酌量派發應令將軍佟保不必增兵五百仍照爾等前奏俟行時令各賚三月口糧至中西二路之兵俱每人帶廐役一名馬四匹此軍亦應照此例合烏喇現在二千九百餘匹之馬共派足四千之數加意飼養烏喇捕獵人另有職役可無庸派其各處馬

匹著該將軍副都統官員嚴加監視務令肥澤如
兵丁怠惰以致盜去遺棄從重治罪仍令賠償倘
疲瘦瘦斃令該管官保結將軍副都統親身詳查
造冊報部中西二路烏鎗兵並未給與車輛其派
牛駕車之請不准行至官兵啟行時可照常給一
年俸餉副都統沙納海耿額著該將軍酌量帶往
此旨亦令副都統齊蘭布前往宣諭

已酉

命恩賚從征綠旗官兵

上諭兵部曰軍行伊邇所派從征綠旗官兵應加賞賚
宣化府兵三千古北口兵一千五百大同府兵五
千著戶部按名賞銀十兩務使均沾實惠

命天津總兵官岳昇龍中路護運先是岳昇龍奏請
從征准於先鋒營効力至是

上諭兵部曰軍督事重護運之任與行兵同可令岳昇
龍隨于成龍等護運中路米糧俟別有所用再行

調取

命操演運朱官兵時直隸巡撫沈朝聘山東巡撫楊
廷耀河南巡撫李輝祖各率押運道府州縣等
官先後抵京三省挽車兵卒亦將齊集

上命大學士伊桑阿傳諭于成龍等直隸山東河南三
省兵夫到齊務令操演熟習進止安閒并使與押
運官各相識認庶有呼必應驅策始靈翼日子成
龍等口奏演車兵卒兼習放鎗請八旗漢軍火

器營官數員訓練之

上曰爾等其酌量咨取於南苑內操演

辛亥擢副將馬進良為古北口總兵官白斌為
宣化總兵官

上諭大學士伊桑阿等曰古北口總兵官李士達患病
不能前來著解任時方用兵可將石匣副將馬進
良陞授其副將員缺以劉虎陞授宣化府總兵官
許盛年老患病亦著解任其缺以通州副將白斌

陞授令伊等俱於歲前星速赴任白斌抵任後可
遴選本標兵帶往軍前

命懷慶總兵官劉國興護中路運

上諭中路督運于成龍等曰中路輓輸較鎮守之寄更
為重大總兵官劉國興人材矯健著偕汝等押護
糧運

壬子

賜喀爾喀台吉占巴喇等服物先是原任郎中阿必

達奉

命往令喀爾喀諸扎薩克內移至是奏言臣至喀爾
喀王納木扎爾處聞慙都叛去即會同王納木
扎爾暨貝子阿難大旗下台吉丹津車陳汗旗
下台吉陶賴等併力往追以馬疲雪阻不獲前
進時慙都屬下協理旗務台吉占巴喇貝子阿
難大旗下綽諾色楞等力微勢弱被慙都逼往
隨牧後至海魯爾河遂入據林中不隨遊牧慙

都率兵來擊占巴喇等即裂幕為盾領衆逆戰殺傷相當奔還自訴又貝子盆楚克聞變率兵來會臣軍約二百名追慙都與戰於呼拉濟地方慙都敗走欲遣人躡其蹤跡奈台吉旺扎兒所屬胡進隱匿馬羣不付驛傳以致稽悞

上諭理藩院曰占巴喇等據險距寇力戰來歸且會同盆楚克等兵窮入追殺殊屬可嘉著賜與蟒服緞布以示獎勵王納木扎爾貝子盆楚克等聞慙都

叛逃即合力往追奮身與戰具見報効忠忱著行
文阿必達將陣亡被傷姓名人數查明報部另行
議叙胡進隱匿馬羣致悞機務可交該扎薩克鞭
責一百示警嗣後凡有馳驛情事立行應付勿得
遲悞再檄知阿必達當嚴查盜竊橫行仍不時偵
探聲息

命增撥蒙古兵輓中路米車先是

上命撥喀喇沁兵一千名輓添造車輛至是于成龍等

以三省撫臣每車已添派兵夫啟奏

上諭曰輓運兵夫三省巡撫雖已按車增派蒙古兵營
力壯健能耐艱辛且習於牽輓著再撥翁牛特兵
五百名前去

命中路督運于成龍等照時值採辦車馬勿累工商

癸丑

命內府佐領兵照旗兵分朋總管內務府奏言內府
佐領備征之護軍校護軍計一百一十人照旗

兵四人為一朋定為二十六朋餘六人分為二朋撥什庫驍騎計一百五十六人以四人為一朋定為三十九朋除護軍校護軍撥什庫廢官外驍騎計一百八人雖各有馬二三匹軍行時尚缺一匹今一應俱照旗兵例分派行裝請以內府各佐領下現養一百四十二匹之馬內每驍騎各給馬一匹

上是之尋都統公俄倫岱以八旗漢軍所養馬匹除給

鎗礮驍騎外餘者請給綿甲軍各一匹以為駕車裝載口糧之用

上從之

乙卯

命選察哈爾兵分翼就宣化大同養馬

上諭大學士伊桑阿等及兵部理藩院曰朕思察哈爾左右二翼每翼可各得銳卒八百人左翼定為中路每兵令自攜馬三匹至宣化府交養馬大臣協

同喂飼右翼定為西路每兵亦令自攜馬三匹至大同府與地方官協同喂飼務令肥澤隨大軍進發不致有悞可著上駟院侍衛馬什赴左翼鑲藍旗蒙古護軍叅領羅米赴右翼將所有兵馬各按數選集速令赴宣大二府其兵衆內或馬數不足三匹者即以官員馬匹充數驅養又聞大同草豆殊少其即於附近州縣足供芻秣處分羣往飼亦可

聖祖仁皇帝親征平定朔漠方畧卷十八

欽定四庫全書

聖祖仁皇帝親征平定朔漠方略卷十九

康熙三十五年正月庚申

命增兵備用

上諭大學士伊桑阿等曰除現備兵外今應增發兵每
佐領二名及火器營兵五百名備用如無所用即
令於京城預備著議政大臣集議議曰除現在每
佐領下預備兵六名外今增派每佐領下護軍

二名及烏鎗驍騎五百名以備遣用其管轄官員應照其兵數酌量派出此增派之兵亦應按名計備官馬四匹查發往宣化府景州等處喂養馬匹并京城所喂之馬內除撥隨中西二路大兵以及中路大兵按名計馬四匹外每一佐領止餘馬四匹今應按馬仍發價三十兩令每佐領下再各置馬十匹照前給與錢糧飼養以備此增發之兵之用奏入

上曰著增派每佐領下護軍一名及烏鎗驍騎五百名
其獲罪人等及情願効力官員俱著隨此兵進發
大臣亦應派出預備餘如所議尋

諭議政大臣曰後派烏鎗驍騎五百名外每佐領下
著再增派一名俱定為中路尾大軍後進發一有
所用即聽指揮而行可派出都統都斯噶爾石文
煥護軍統領鄂克濟哈副都統西珠法喀預備

命春米餉軍

上諭督運于成龍等曰倉貯米糧春時必多虧耗爾等所運之米可交倉場總督春熟運往給與兵衆

癸亥

諭督運于成龍等加意防護軍糧馬匹

上諭于成龍等曰爾等輓輸絕塞務火燭小心每夜如臨敵兵嚴為防護喀爾喀等素善盜馬尤宜加意巡視喀喇沁兵守馬防賊頗稱熟練可將伊輩分與各營畫使驅車夜使守馬庶乎有備無虞至新

滿洲健於步行熟於牽輓故選擇數人交與爾等
其酌量用之隨復

諭曰喀喇沁兵朕已遣大臣調至彼內亦有副都統
等官馬上素稱熟練爾等所備駕車空馬可交伊
等沿途驅往

乙丑

命陝西兵來與大將軍伯費揚古軍會

上諭內大臣索額圖等曰前因厄濟內河燒荒曾命陝

西兵於四月初旬進發若俟四月進兵似覺遲悞
應將陝西兵調至寧夏令其出寧夏來會大將軍
費揚古所往翁金之路兩軍會合後即令費揚古
將兵酌量均撥分路前進前此陝西兵卒原派發
一萬三千今既令前來可減其兵數止以一萬為
額如此則馬匹糗糧俱獲豐裕軍機關係甚大明
晨著原議之議政大臣作速集議議曰

聖諭已極周詳應令將軍孫思克率陝西大兵來至寧

夏於三月初十前後出寧夏來會費揚古軍即
令費揚古將兩軍酌量均撥分路前進再先經
僉議派陝西滿洲兵三千漢軍火器營兵一千
綠旗兵九千兵力宜強似應無容減額仍照原
派之數今既不出鎮彝俱從寧夏進發前此遠
方調來兵卒若可帶至寧夏則帶領前進倘因
路遠不便即交孫思克將甘肅固原提督及撫
標官兵所用馬匹酌量選取調用奏入

上可其議著先差善馳之筆帖式撥什庫作速往諭尚
書圖納亦令其速往

命賞從征綠旗官兵先是

上諭兵部軍士已屆征期宣化府古北口綠旗官兵宜
加恩賞至是部議以派出預備宣化府綠旗官兵
三千古北口綠旗官兵一千五百應交戶部加
恩賞賚銀兩奏上

報曰可大同綠旗官兵隨大將軍費揚古前往亦著

一體賞賚

命天津總兵官岳昇龍等率騎兵護送中路糧車時
岳昇龍以米車前後非得騎兵不能往來巡護
請選直屬精騎二百名及山東省臣舊轄精騎
一百名帶往

上命督運于成龍等確議議曰岳昇龍所請山東兵百
名停其帶往可率直隸馬兵二百名車前領運
劉國興率河南馬兵二百名車後催運此四百

名兵所需一百四十日口糧亦在通倉領出於
添造車內裝運議上得

旨岳昇龍所請山東馬兵百名仍准帶往餘如所議
定運車旗式督運于成龍等奏言運米車上所
用旗纛請照漢軍火器營式樣製辦

上曰火器營關係緊要若與之一式是無別也運車旗
幟色用白畫飛熊其上爾于成龍曾任鑲紅旗都
統今督理運務可仍用前都統旗纛

命都統王永譽從中路征

命給黑龍江等處官兵行糧時將軍薩卜素以所屬
墨爾根黑龍江七齊噶爾三處官兵購買馬匹
治辦器械俸餉不敷所用請給行糧移文戶部
部議以目今

盛京寧古塔黑龍江之兵暫無所用其薩卜素給
與行糧之請可無庸議奏入

上曰此軍雖現無行走之處著照該將軍所請給與行

糧尋大將軍伯費揚古請給編附右衛之蒙古官

兵行糧得

旨可照內地官兵一體給與

丙寅

命延綏波羅營副將劉官統同陝西兵進剿

己巳

命福建陸路提督張雲翼從中路軍時張雲翼來京
陛見奏請從軍効力故有是

命

命添設烏鎗大臣

上諭內大臣公常泰曰烏鎗大臣太少一旗應設大臣
一員統率為善除前鋒統領碩鼐不可別調外鑲
黃旗派內大臣馬思喀正黃旗派都統侯巴渾泰
正白旗派護軍統領托倫正紅旗派公常泰鑲白
旗派護軍統領蘇赫鑲紅旗派副都統孫渣齊正
藍旗派副都統雅圖鑲藍旗派副都統宗室鄂飛

管領此派出大臣各照本旗旗色持纛前往

諭增造中路運車

上諭督運于成龍等曰中路米車所載過重遠輸沙漠
恐馬力難勝可再增造五百輛均分裝載至朕每
舉一事惟恐累民故前造中路之車俱動內帑錢
糧誠以民力無幾而吏不之恤致失朕意也先時
朕出口外直隸巡撫常令地方官預備車二三百
輛或至累民今朕統師北討凡所需供應細物將

爾等預備車內分撥裝載其會同兵部僉議議曰
軍糈事急過重難以行遠已蒙

睿照著增造車五百輛其增造之費在前所領帑金
內動用至

御用車輛若交地方官預備恐致累民應欽遵
聖諭停其備辦凡

御營需用裝載俱於臣等預備車馬內撥用其押車人
員著中路効力官及地方官內酌量分遣兵部

章京筆帖式照常派出公同管押議入得

旨如此則不致累民其亟行之餘如所議

庚午

命侍郎安布祿出哨偵探

上諭理藩院侍郎安布祿西喇曰尚書班第出哨日久而又撥發從征著班第歸以辦行裝爾安布祿往居班第所駐之地凡事俱如班第行爾安布祿亦已派軍中可即從彼地而往如班第所在官員有

願從征者令歸來治具至彼處偵探人員視其緩急應留者留之若無要務可即遣歸

辛未

宴賚出兵及運米大臣官兵於

太和門先是

上諭總管內務府衙門曰可將內庫所貯綢絹蟒緞等物酌量分定賞給出兵大臣侍衛八旗叅領前鋒侍衛及部院衙門滿洲漢軍大臣學士以上等官

其護軍校驍騎校前鋒護軍亦給以緞疋驍騎火
器營兵礮手皆給與布疋至運米大臣官員綠旗
大臣官員俱係從征亦照其品級賞給緞疋此番
所備之兵不比前次朕熟思已久必期成功故凡
大臣以下兵丁礮手以上均施以恩可於十四日
大賜筵宴宴畢賞以緞疋等物至是日巳時

上御太和門陞

座兩旁內大臣侍衛大學士等列坐階下金水橋內

出兵大臣官員前鋒烏鎗護軍等分左右按旗
分坐運米大臣官員坐於左綠旗提督總兵官
等坐於右橋外護軍叅碩護軍校護軍等亦分
左右按旗分坐午門外効力廢官烏鎗驍騎火
器營兵礮手等亦依次坐坐畢樂作演內監戲
衆技畢陳

上命大將軍費揚古進至

座前

手賜卮酒費揚古跪受退至階叩首飲都統前鋒統領護軍統領及運米左都御史于成龍督捕侍郎李鈞提督張雲翼總兵官岳昇龍馬進良等俱上手賜飲其副都統等亦進前著親近侍衛賜飲前鋒叅領護軍叅領及運米官員自委署護軍校以上皆十人一班進至階上跪飲又

命內務府總管親隨侍衛及部院大臣徧視衆軍士飲至申時宴畢

上始回宮凡與宴之大臣侍衛八旗叅領前鋒侍衛部
院大臣學士督運大臣提督總兵官以上俱賜
御用立蟒緞綢有差其出兵運糧官員及護軍校驍騎
校前鋒護軍等俱賜緞有差烏鎗驍騎火器營
兵礮手等俱賜布既畢大將軍伯費揚古率衆
官兵進前謝

恩奏曰自古人君賞賚官兵者有之如我

皇上親臨宴犒徧加賜賚者實所未有臣等受

皇上隆恩何能仰報惟有遇噶爾丹誓必磔斬無遺而已齊聲奏畢同叩首出

命給古北口及宣化府總兵官烏鎗

上諭兵部曰古北口總兵官馬進良宣化府總兵官白斌各給以內造烏鎗二百桿火藥鉛子一併付與馬進良現在京城即交伊本身爾部撥給驛車令彼帶去白斌處爾部可差人送往此鎗回軍之日仍令繳內收貯

壬申

命選派蒙古官兵并發火箭至軍前時大將軍伯費
揚古奏言春時進兵正蒙古馬瘦之時若不將
扎薩克王貝勒貝子公台吉等派出不得壯健
人馬請將扎薩克王貝勒貝子公台吉及閑散
台吉等附丁揀選其人材健壯家道殷實者派
出似為得力至於火箭尤為軍中需用之物伏
望發至軍前

上從之發內庫所貯火箭三千解往

川陝總督吳赫請赴甘州料理軍需并防守邊境時吳赫奏言大兵進勦噶爾丹需用運米駝馬以及牛羊等物極其繁多若不預行採購恐致遲悞臣身駐西安不能遠為料理臣欲前赴甘肅會同該撫選擇才能官員分行採辦以備大軍進發至於三邊地面甚屬遼濶番彝之人沿邊雜處今將軍孫思克等深入征勦其防守

不可不嚴西安現有副都統費揚固巡撫党愛臣請將臣標下官兵酌量選帶暫駐甘州嚴守邊境奏至

上從之

命調副將周洪昇等押中路米車時督運于成龍請撥官兵押運

上諭曰前有各省督撫提鎮保題武弁召見記名者今概調來京遠者難以立至爾等可就近將直隸山

東河南江南四省凡記名及各上司保題之員爾等查兵部檔案具奏于成龍等同兵部查四省副將等員開列山東膠州副將周洪昇等二十七人職名奏入

上俱令派發押護中路糧車

命嚴守喀倫時內閣侍讀學士伊道奏言鄉導朱爾渣哈等至厄折忒圖哈卜七爾地方見有人馬行踪約四百餘沿克魯倫河上流而去觀其形

勢乃係厄魯特因令車臣汗貝子盆楚克等入
內遊牧而車臣汗等以目今羊當產羔牲畜羸
瘦不便遷移俟雪融時漸次內牧為辭夫厄折
忒圖哈卜七爾地方距車臣汗等目下所居波
衣爾之地止二日程今厄魯特既逼近來前則
凡我喀倫不可不嚴加防備現今兩烏朱穆秦
并阿魯科爾沁之喀倫雖每處有章京一員兵
十名然軍力微弱每處應添章京一員兵十名

至扎魯特科爾沁等旗喀倫與車臣汗等所居
波衣爾之地相近亦應嚴飭堅守喀倫奏至

旨下所司議理藩院議以朱爾渣哈等雖見其踪跡
並未望見形影應移文與伊道令其再選精細
能事之人探明實信速行奏報其車臣汗貝子
盆楚克等既云羊正產羔牲畜羸瘦應令伊等
遠行偵探暫居原所俟伊等可行之時再入內
遊牧至於喀倫地方每處原設章京一員兵十

名其添設官兵可毋庸議再檄知烏朱穆秦阿
魯科爾沁扎魯特科爾沁及黑龍江將軍薩卜
素處令其嚴飭各旗喀倫官兵加意防守奏上
上從之

命西路兵簡護軍為前鋒大將軍伯費揚古請於大
同養馬八旗護軍內簡選二百烏鎗護軍內簡
選八十為前鋒其前鋒旗幟交地方官製造

上從之尋以副都統碩岱為前鋒統領

命以親征原委曉諭大小諸漢官時

上欲親統大軍往征噶爾丹大學士王熙等及漢九卿

大臣科道等官恐

聖躬勞瘁奏曰欽惟

皇上茂德豐功文經武緯誠邁百王而超千古前以三

逆負

恩察哈爾作亂賴

皇上運用神謀皆立時授首懸之藁街及功成事定又

平臺灣以為郡縣此數十年間時和年豐民安
物阜域內咸享昇平之福凡天之所覆地之所
載亘古以來聲教所未及者無不仰戴

堯天舜日來享來王乃嚙爾丹狡焉小醜反覆靡常
二十九年敗遁之後

皇上擴天地之恩不忍絕其根株詎意嚙爾丹賦性愚
頑並不改行易心而來納款敢自外於

王化屢行狡獪用是

皇上赫然震怒欲行

天討凡進兵運餉之務俱奉

睿算指揮毫不勞苦百姓是以小民不知有兵安堵
如故稽古史冊如今日之人馬精強兵革堅利
軍容猛銳

聖算神奇者誠未之有臣等雖係書生不諳軍務亦知
天兵所向必克可不崇朝而滅此小寇也

皇上奮雷霆之威躬統六師往揚

神武擲風沐雨不憚勤勞

皇上雖為社稷生民謀億萬年之計但臣等愚意以為
皇上乃

天地神人之主身有舉動係天下萬國之瞻仰噶爾丹金

內遊魂以我兵強將勇又遵行

成算自必繫其頸而獻諸廷

皇上端拱九重之上坐受捷音燕享賞勞指日可待無

煩

皇上玉體親行伏祈

皇上遣將授兵教之方略使早奏大勲以慰中外臣民之望奏入

上諭大學士伊桑阿阿蘭泰曰漢大臣諫阻朕不之怪為人臣者不欲以軍務勞君身者亦當然之事但此噶爾丹為人狡詐不比尋常小寇前年來犯我藩塞語極兇悖理藩院尚書阿爾尼率四十九旗蒙古及察哈爾兵遇噶爾丹之兵而辟易是以朕

熟籌務必滅之指授出征諸王將軍於七月初六日起行朕躬隨於七月十四日起行又恐噶爾丹聞朕親行而遁去以兵一枝授內大臣阿米達誘之近至烏蘭布通之地是時諸王大臣皆在軍中竟使噶爾丹逸去於此爾等可知之矣適會朕躬有疾未到戰地果知其如此朕必力疾而往也失此良會匪啻朕一人至今恨之舉朝亦無不以為恨也所以朕不得不親行者職此故也近者噶爾

丹背誓掠我蒙古邊外住居之喀爾喀又煽誘諸
蒙古不無顧望而持二心者倘不早為之剪滅恐
其勢漸張今以時勢言之天下無事四海太平朕
踐祚以來無日不以軍民為念雖未嘗加大恩於
民而撫綏有年想天下臣民必皆愛戴是我內地
可以無虞如京中事則皇太子已長可料理之乘
此時而朕親往征之亦一良會也今噶爾丹屯聚
巴顏烏闌距蒙古界上不甚相遠是以不憚勞苦

躬臨邊塞大兵分路並進者特欲迅掃逆賊以絕
後患也噶爾丹滅則天下不復有事矣即噶爾丹
望風遠遁而以我神兵之威揚播外藩不亦善乎
失今不圖噶爾丹來侵我四十九旗則必調天下
綠旗沿邊守戍所憂不益多乎爾等其以此曉諭
漢大小臣工知之

乙亥

趣西路官兵作速起行時將軍孫思克奏言先經會

議令派陝西綠旗兵九千臣同尚書圖納公議
於臣標下五營馬兵內派一千八百涼州總兵
官所屬馬兵內派二千寧夏總兵官所屬馬兵
內派一千五百肅州總兵官所屬馬兵內派二
千西寧總兵官所屬馬兵內派一千二百總督
標下馬兵內派五百共選派九千名其領兵之
副叅遊守千把等官仍照前議定之數揀選派
出此派出之兵務令於二月初十以內齊集甘

州喂馬一月一同出邊臣查河西地方涼州莊浪甘州肅州俱係沿邊要地且逼近蒙古應令提督李林隆酌量調取官兵來甘州駐劄防守又先經僉議從征綠旗兵丁除本身坐馬外可按名多給一匹臣隨將提督總兵官所屬存留兵丁之營馬內選其肥健者如數分給九千匹但甘肅地方苦寒不比內地青草發萌甚遲臣等之兵於三月二十前後青草已萌即行出口

倘尚未萌達欲再守候數日為此奏

聞

上諭諸王曰大將軍費揚古兵於二月二十日前後進發將軍孫思克兵亦應令於二月二十日前後自寧夏起程甘州肅州等處兵若調至寧夏路途遙遠其到必遲現今寧夏有滿洲兵一千漢軍火器營兵五百應再增以西安滿洲兵一千漢軍火器營兵五百以足三千之數再寧夏榆林二總兵官

標下綠旗兵共選派六千即令該總兵官率領同將軍博濟副都統阿南達等於二月二十日前後自寧夏起程令將軍孫思克將伊標兵酌量選帶速來寧夏如及期而至則一同進發倘或不及可隨後踵進其滿洲漢軍兵丁馬匹未及喂肥著該將軍總督等將存留滿洲漢軍并綠旗兵丁馬匹內酌選肥健者更換付之其添給綠旗兵丁馬匹并負隨運米糧之駱駝馬騾俱令於各營及驛馬

內選其臚壯者給付此路隨運糧米俱著照前議
備辦一切事務令尚書圖納會同該總督巡撫提
督等公商料理毋致有悞提督李林隆速往甘州
駐劄酌量徵調官兵加意防守地方速檄知之

丙子

命議增綠旗兵鹿角

上諭管漢軍火器營都統李正宗曰是役也有綠旗兵
三千朕意欲使綠旗兵居中漢軍居兩旁其鹿角

如何增加所增鹿角如何捆載擡鹿角人役口糧
如何運到爾其與戶兵二部議之議曰是役之兵
已派出古北口綠旗兵一千五百名宣化府綠
旗兵一千五百名此三千兵應增帶鹿角一百
六十架其擡鹿角也應派出八旗漢軍步甲四
百八十名所派步甲每人撥馬一匹四人為一
車以此馬挽之伊等八十日口糧兵器俱載此
車之上但漢軍旗下現置馬匹無有餘剩應折

銀每匹三十兩給之購買其車各自本旗內撥
給至鹿角三架以駱駝一頭捆載共計需駱駝
五十四頭取捐助駱駝給之伊等隨運兩月口
糧應交左都御史于成龍等奏入

上從之

辛巳

命定軍廝立功賞格

上諭內大臣公國舅佟國維等曰官軍之廝役人等有

能踰鹿角營而進擊者作何給還本主身價令其
出戶以示勸勵爾等集議議曰官軍家下兵丁廝
役或駱駝營或鹿角營或於曠野賊兵對敵之
處有能首先躍入衆人接踵繼進以致殺敗賊
寇其首先躍入之家下兵丁廝役以及其父母
妻子俱撥在佐領立為另戶主照例計其人口
給還伊主身價奏入

上曰其第二三前進者亦著照此例行

諭分派西路都統副都統督八旗營壘

上諭大將軍伯費揚古曰爾軍中所有都統副都統等
可令各分管八旗營壘費揚古道

旨派管京城所發八旗大兵營壘以揚威將軍覺羅
舒恕管兩黃旗以都統伊勒慎管兩白旗以都
統公彭春管兩紅旗以侍郎滿丕管兩藍旗派
管右衛八旗兵營壘以護軍統領宗室費揚固
管鑲黃正白兩旗以護軍統領瓦爾達管正黃

正紅兩旗以副都統愛管鑲白正藍兩旗以副都統拜音布管鑲紅鑲藍兩旗

壬午授中路督運左都御史于成龍等

勅印

勅曰今厄魯特噶爾丹毀蔑盟誓傷我使者搶掠喀爾喀人等又阻尼班禪庫圖克圖之來陰蓄狡謀違旨妄行用是遣發各路大兵聲罪致討進勦大兵所需糧米浩繁督運責任重大必須專委大臣

統理今特命爾都察院左都御史于成龍兵部督捕右侍郎李鈞通政司左通政喀拜總理運送中路大兵軍米事務爾等督運之米務隨大兵運到勿得遲延有悞軍需駐搭之處必安營壘令兵丁加意巡防所派副都統總兵官部院官員以及爾等題帶文武各官俱酌量派定分委押運其情願効力人員亦量行分派隨押車輛俟到邊外如有用蒙古兵之處即將爾等經過相近地方所有蒙

古兵丁酌量調用有貽悞修路搭橋者即行指名
題叅凡關運米事情各部院不得掣肘爾等總理
運務亦須熟計征戰事宜將官兵不時操練務使
賞罰嚴明其勅中開載未盡事宜爾等即會同商
酌而行倘遇有征戰之處與副都統盧崇耀總
兵官岳昇龍劉國興等商計而行有於運米事情
勤勞供職者即彙題獎勸如有怠玩厥職不効力
勤勞者即行叅奏懲治或官員或趕車兵役偷盜

米糧馬匹及妄作非為者即以軍法從事示衆爾等庸茲重寄務須殫竭心志黽勉効力將米運至軍前以濟軍需斯克副朕委任之職如或因循怠忽措置乖方致悞職任責有攸歸爾等慎之故諭尋授西路督運侍郎王國昌等

勅印

勅與中路略同

命增發綠旗兵防守歸化城

上諭大將軍伯費揚古曰大兵前進勦滅噶爾丹歸化
城地方緊要土默特二千餘兵外著增撥宣化府
綠旗兵一千駐防此軍應派內地諸王統領著議
政大臣議議曰

諭旨甚是應於土默特二千餘兵外增撥宣化府鎮
標步兵一千防守歸化城管領將弁照兵數派
出內地諸王該衙門請

旨派出俟大兵滅噶爾丹凱旋之日撤回此軍

上從之尋以安郡王馬爾渾輔國公來僖副都統雅圖

防守歸化城地方

癸未授撫遠大將軍伯費揚古

勅印

勅曰今厄魯特噶爾丹毀蔑盟誓傷我使者搶掠喀爾喀人等又阻尼班禪庫圖克圖之來陰蓄狡謀違旨妄行勦滅不容少緩用是遣發各路大兵聲罪致討特命爾領侍衛內大臣伯費揚古為撫遠

大將軍統領西路大兵一切事宜爾與都統伊勒
慎護軍統領宗室費揚固護軍統領瓦爾達副都
統碩代理藩院侍郎滿丕等公同計議而行勿謂
自知而不納衆論勿當事會而致失機宜勿恃兵
強而輕視逆寇嚴偵遠探罔或疎虞其統領蒙古
兵丁前來之王貝勒扎薩克台吉與綠旗總兵官
等共相商確酌量行事爾仍總統調遣有能擒斬
噶爾丹來歸者分別具奏有情急來歸者務加意

撫恤副朕戡亂靖逆之懷官兵或臨陣退縮貽誤
軍機爾會同商議官員以下即以軍法從事示衆
官兵犯小過者會同商酌徑行處治勿泯沒官兵
功績勿寬縱違犯法紀之人賞罰之際務極嚴明
如有用運米綠旗官兵與情願効力人員之處爾
即酌量調遣爾等將厄魯特殲勦廓清安靖邊圉
斯稱委任爾等宜殫竭心力蚤奏膚功欽哉故諭
命設西路驛站先是

上諭大將軍伯費揚古侍郎滿丕等曰西路設驛事宜
爾等可交理藩院兵部集議至是二部集議自京
城至殺虎口原設有驛不議外自殺虎口以外
置驛六十處每驛設馬二十匹兩驛合設筆帖
式一員撥什庫二名蒙古官一員兵十名更請
於鄂爾多斯六旗內派馬五百匹再取直隸河
南附近府州縣偏僻驛站中馬一千匹酌量安
設六十驛需馬一千二百匹以所餘三百隨之

自西路以至中路軍前如有設驛之處可交大將軍費揚古即於此馬內酌量安設奏入

上從之

命限中路官兵賞糧額數

上諭議政諸臣曰中路兵丁仍帶八十日米外諸王大臣侍衛官員俱著帶百日之米

恩賜西路從征土默特官兵先是

上諭大將軍伯費揚古曰是役歸化城土默特從征兵

丁應加恩著交該部至是理藩院議西路從征之
歸化城土默特都統阿喇納副都統阿迪阿玉
璽多爾濟等應賞緞各二疋實授叅領二員叅
領署夸蘭大四員叅領十員佐領十二員賞緞
各二疋閒散章京十二員驍騎校十員賞緞各
一疋兵八百名每人賞銀五兩所賞銀緞戶部
差官送至歸化城交大將軍伯費揚古親視給
賞

上從之

甲申

命選備追勦精兵

上諭兵部等衙門曰大兵至巴顏烏闌倘噶爾丹不敢
迎敵從此遁去可預選察哈爾兵一千六百名喀
爾沁翁牛特兵一千四百名再於大兵內及新滿
洲諸王護衛喀爾喀兵內共選精兵一萬備足駝
馬糗糧務將噶爾丹窮追勦滅爾等其酌議以備

命都統公彭春為西路軍中叅贊先是以彭春為叅
蘭大遣至西路至是授彭春為都統

上諭兵部曰著以彭春為西路叅贊

乙酉

諭恩賚輓運兵丁

上諭中路督運左都御史于成龍等曰出師討寇全資
兵力內外滿洲漢軍綠旗諸路從征兵丁俱已各
加恩賚其外省調集步兵輓運軍糧載塗况瘁尤

可軫念所有每月應支銀米本營照常支給俾養
贍室家仍各給與行糧以為道路之費所運米石
如悉依期輓至克濟軍需不致虧損遲悞俟大兵
凱還補入馬兵營任用以彰獎勸有效力勤敏才
堪拔擢者爾等可記名彙奏以俟酌用兵丁勞苦
饑寒凡督運大臣官員宜時加拊循慰勉庶人爭
自効踴躍赴公西路輓運兵丁亦照此例行爾等
可移文各該撫通行曉諭宣朕體恤軍士至意

聖祖仁皇帝親征平定朔漠方略卷十九